

Senza voluntaris marscha nuot

Dall'uniun caritativa, culturala entochen tiel sport – senza igl engaschi da biaras persunas per in dieus paghi stess ina buna parta dalla veta publica e sociala eri. E corona ha definitiv buca frenau la promtadad da s'engaschar, silmeins buc tier las uniuns ed instituziuns plidentadas dalla FMR.

ANDREAS CADONAU/FMR

Buca meins che 550 voluntaris e voluntaris dumbra la Crusch cotschna grischuna sco quei che la pagina dall'instituziun tradescha. «Quels voluntaris prestan denter 30 000 e 35 000 uras da lavur per onn.» Quei gj la gestiunaria dalla Crusch cotschna grischuna, Denise Ryffel. Quella lavur voluntaria ei essenziala per l'instituziun caritativa, puntuescha la meinafatschenta. E la promtadad da s'engaschar ei vinavon avon maun, era sche dus onns corona han sfurzau bia persunas da seretzer pli fetg ellas atgnas quater preits. «L'egreivlamein ei la promtadad da luvrar a favur dils survetschs dalla Crusch cotschna aunc adina aulta.»

Satisfatgs digl engaschi

Otto Beer presidescha il Club da ballapei Trun/Rabius e ha investau dabia uras per anflar in niev trenader per l'emprema equipa. Ed el vegn a stuer s'engaschar vinavon, era sch'els dus trenaders actuals ein prompts da continuar entochen la fin dalla runda d'atun (LQ dils 29 da zercladur). Ver 200 commembers dumbra il Club da ballapei Trun/Rabius e viers igl engaschi da quels commembers dat ei nuot da dubitar. «Gie, quei engaschi funcziuna e jeu sun satisfatgs da quei fatg.» Otto Beer menziunescha il turnier da ballapei dil 19 da zercladur organisaus dil club a Trun/Pustget. «In tal turnier drova denter 35 e 45 persunas che stattan a disposiziun als organisaturs.» Kiosk, grill, arbiters, meinaturniers ed auter drova persunal. «Demai ch'avunda commember stattan a disposiziun san els aunc sez giugar en ina equipa da turnier sper la lavur sil plaz.» Mo era du-

ront igl onn vegnan ils commembers clamai a lavur cumina per adattar ina ni l'autra caussa entuorn las piazzas da ballapei.

Sustegn da tuttas generaziuns

Gordian Blumenthal presidescha l'uniun Cinema Sil Plaz cun 400 commembras e commembers. La puschida culturala cun kino, concerts e menaschi da bar el marcau da Glion sebasa bunamein cum-

plet sin lavur voluntaria. «Biabein 80 persunas prestan lavur voluntaria a favur dil Cinema Sil Plaz e siu programm da cultura.» Seigi quei davos la bar, vender entradas, mussar films ed auter. «Igl engaschi sedifferenziescha fetg, singuls commembers ein pliras ga el meins en acziun, auters pli sporadic.» Senza quella promtadad da luvrar dess ei negin Cinema Sil Plaz. Duront corona ei il menaschi staus reducius, sche buca seraus. Era Gordian Blu-

mental ha buca sentiu ch'ei fuss forza pli grev da motivar ils commembers suenter corona. «Na, atgnamein funcziunescha il menaschi sco adina.» Bunas experiencias ha il president denton fatg cun la pausa da stad ch'il Cinema Sil Plaz ha introduciu avon entgins onns. «Quella pausa schazegian tuts.» A favur dil kino cun concert e bar a Glion s'engaschan tuttas generaziun. «Dils fetg giuven entochen las senioras ed ils seniors.»



Dalla lavur sociala, culturala entochen tier la piazza da ballapei. Senza engaschi da voluntaris e voluntaris svanescha la veta sociala ed ina buna part dil survetsch caritativ. FOTO CB TRUN/RABIUS

S'engaschar suenter la pensiun

Ad Otto Beer perencunter maunca empau la generaziun ella vegliadetgna da 35 entochen 45 onns. «Enaquella che la scolaziun ei finida e la famiglia fundada tuorman biars buca pli en Surselva.» Quei fa empau quitaus al president dil Club a ballapei Trun/Rabius. Clar ei per il president dil club ch'ins sa buca paregliar la situaziun dad oz cun quella da pli baul. «Quei ei denton era buca necessari.» Il president sez ei cun ses 70 onns in mussament che la vegliadetgna ei negin impediment per luvrar per il generaleesser. Denise Ryffel dalla Crusch cotschna fa medemamein attent che las persunas che s'engaschan per sia instituziun vegna da tuttas spartas dalla societad. «Beinduras era persunas pensiunadas che vulan contribuir enzatgei alla societad.» La Crusch cotschna ei pertscharta ch'il engaschi voluntari sa ir a fin dad in mument sin l'auter. «Negin s'oblighescha en ina moda ni l'autra e perquei encurrin nus adina puspei novas voluntaris e voluntaris.» Per part succeda quei a bucca, via inserats en gasettas localas ni via la plattform benevol. Ina plattform ch'intermediescha voluntaris e voluntaris per uniuns ed instituziuns da tut gener.